



Sesida dals

Communitgà ils

Protocol nr.

20 d'avust 2019

21 d'avust 2019

603

Dumonda da la fracziun da la PPS

concernent ina survista e trasparenza davart ils augments dals custs en l'agid social

Resposta da la regenza

Sche persunas en Svizra crodan en ina situaziun finanziala d'urgenza, pon ellas sa drizzar a l'agid social. La quota da persunas dal chantun Grischun ch'èn stadas en questa situaziun e ch'èn vegnidas sustegnidas da l'agid social è restada relativamain constanta durant ils ultims 10 onns tar circa 1,1 fin 1,4 pertschient da la populaziun. Er relativamain constantas èn las gruppas da la populaziun che crodan en ina situaziun d'urgenza: uffants e giuvenils, persunas divorziadas, persunas nubilas, persunas ch'educheschan sulettas e persunas che n'han betg la scolaziun da basa necessaria dovran spezialmain savens agid social. Las cifras da l'uffizi federal da statistica (UST) mussan che agid social vegn duvrà en il chantun Grischun per gronda part da persunas, che han ina lunga dependenza structurala. La quota d'agid social dal chantun Grischun è ina da las pli bassas da la Svizra. L'onn 2017 sa chattava ella cun 1,4 pertschient da la populaziun cleramain sut la media svizra da 3,3 pertschient. Il medem mument po il chantun Grischun cumprovar en il sector d'asil e da fugitivs er vinavant in'auta quota da gudogn cumpareglià cun il rest da la Svizra (SEM, statistica d'asil dals 31 da matg 2019).

Per responder questa dumonda da fracziun èn stadas a disposiziun las datas dal UST ed infurmaziuns da la gulivaziun da las grevazzas socialas (GGS). En quest connex ston vegnir fatgas las suandantas restricziuns. Las datas dal UST han in retard areguard l'actualitad e n'han betg adina il grad da precisaziun ch'è necessari per pudair responder tut las dumondas da questa dumonda. La statistica da finanzas da las prestaziuns socialas dependentas d'in basegn stat a disposiziun dapi l'onn 2003, la statistica d'agid social (SAS) tenor chantuns dapi l'onn 2005. Plinavant ha il chantun – dapi l'introducziun da la nova gulivaziun da finanzas grischuna per il 1. da schaner 2016 – mo pli per part enconuschientscha da l'autezza da las prestaziuns

d'agid social da las vischnancas. L'onn 2017 han 31 da 106 vischnancas preschentà al chantun lur prestaziuns d'agid social per survegnir ina contribuziun da la GG.

Tar la dumonda 1: Las expensas nettas per pretschs currentes per persuna che ha retschavì agid social en il chantun Grischun importavan tenor il UST en media 9298 francs per l'onn 2017, 8610 francs per l'onn 2007 e 9523 francs per l'onn 2005. Entant che las expensas nettas per persuna che ha retschavì agid social sa chattavan l'onn 2005 sur la media svizra da 7389 francs, èn las expensas nettas restadas l'onn 2017 var 9 pertschient sut la media svizra da 10 116 francs.

Tar la dumonda 2: La quota da personas da derivanza estra e da derivanza svizra en l'agid social vegn retschertgada dal UST en la SAS dapi l'onn 2005. En il Grischun importava la quota da personas estras en l'agid social l'onn 2005 var 28 pertschient e l'onn 2017 var 41 pertschient. En Svizra importava la quota da personas estras en l'agid social l'onn 2017 48 pertschient.

Tar la dumonda 3: La statistica da finanzas retschertga il total da las expensas nettas da l'agid social. Questas datas na cuntregnan naginas caracteristicas che sa referechan a personas. Ina repartiziun da las expensas nettas sin las singulas gruppas da retschaviders u ina differenziaziun detagliada tenor categoria d'expensa n'è perquai betg pussaivla sa basond sin la SAS. Pervia da la basa da datas disponibla n'èsi damai betg pussaivel da responder en detagl las dumondas 3a e 3b.

Ina stimaziun approximativa dal total dals custs da l'agid social per fugitivs reconuschids fin 5 onns suenter l'inoltraziun da la dumonda d'asil sco er per fugitivs admess provisoricamain fin 7 onns suenter l'entrada en Svizra po tuttina vegnir fatga sin basa da las pauschalas globalas pajadas da la confederaziun. D'ina retschertga da l'uffizi dal servetsch social chantunal per l'onn 2015 resulta che las pauschalas globalas da la confederaziun pajadas a las vischnancas grischunas han cuvri il custs da l'agid social da las duas gruppas da fugitivs numnadas cun in grad da la cuvrida dals custs da 101 pertschient. L'onn 2015 ha la confederaziun pajà 6,57 milliuns francs, l'onn 2016 8,16 milliuns francs e l'onn 2017 8,77 milliuns francs.



En num da la Regenza

Il president:

Il chancelier:

Dr. Jon Domenic Parolini

Daniel Spadin